

Mid-Day Dogri News Bulletin, 07th March 2025

समै – 12:25

<><><><><>

Omar

जम्मू कश्मीर विधानसभा च अज्ज तकरीबन 7 ब'रे दे वक्फे मगरा बजट पेश कीता गेआ। मुख्यमंत्री उमर अब्दुल्ला होरें अज्ज बजट पेश करा'रदे न। उंदे कश वित मैहकमे दा प्रभार बी ऐ। उनें विधानसभा च 2025–26 दा बजट पेश कीता। अपने संबोधन च उनें खित्ते दी चुनौतिएं ते होरनें दी गल्ल कीती। उनें जोर देइयै आखेआ जे उनें अपने बजट च स्कूलें दा दर्जा बढाया जाग। 15 ज्हार प्राथमिक विद्यालय खोलने ते तालिका शिक्षा पर ध्यान केन्द्रित करने दी गल्ल कीती। सरकार लोकें दिएं आसैं-तांगें गी पूरा करोग।

<><><><><><>

MOS

केन्द्रीय राज्य मंत्री डॉ. जितेन्द्र सिंह होरें आखेआ जे अर्थबवस्था उत्पादन आले क्षेत्र थमां बायोटेक्नोलोजी आली भेठा जा'रदी ऐ। एह गल्ल उनें स्कास्ट जम्मू च पीबीबीसीओएन-2025 कांफ्रेंस गी संबोधत करदे होई आक्खी। उनें खित्ते दी एग्रोनोटैक्नालोजी दे समर्थ गी उजागर कीता। उनें अरोमा मिशन ते होरने दूइएँ गतिविधिएं ते जतनें बारे बी गल्ल कीती।

<><><><><><>

Women

ग्रामीण विकास ते पंचैती राज मैहकमे आस्सेआ केन्द्र शासत प्रदेश दी पंचैतें च 2 रोला समर्थ निर्माण प्रोग्राम दा सफलता पूर्वक आयोजन कीता गेआ। एहदा मकसद महिला सशक्तिकरण ते कुड़िएँ इनुकूल पंचैतां हा। एह कार्यक्रम राश्ट्रव्यापी पैहल महिलाएं दे अनुकूल ग्राम पंचैतें सरबन्धी प्रोग्राम मॉडल वूमेन फ्रेंडली ग्राम पंचायत दा गै इक हिस्सा हा। इस प्रोग्राम दी शुरूआत मुख्य भरै च पंचैती राज मंत्रालय आस्सेआ 5 मार्च 2025 गी कीती गई। 20 पंचैतें गी मॉडल वूमेन ते गर्ल फ्रेंडली पंचायत दे तौर पर विकसित कीता जाग।

<><><><><><>

Anti Corruption

भ्रष्टाचार रोधी फाउंडेशन आस्सेआ सैलसफा मैहकमे दी आयुक्त सचिव यशा मुदगल हुंदे आस्सेआ कीते गेदे जतनें गी सराहने लेई उनेंगी ड्यूटी आफिसर अवार्ड कन्नै सम्मानत कीता गेआ। एह सम्मान उनेंगी उंदी टकोहदी सेवाएं, उंदी निष्ठा ते कम्में लेई दित्ता गेआ ऐ। मुदगल होरें केई जतन, नीतिएं बनाने च, नमिएं काहडें राएं कार्यक्रम दी शुरुआत करने लेई, जेहदे राएं जम्मू कश्मीर सैलसफा सरबंधी परिदृश्य पर खरा असर पेआ ऐ। भ्रष्टाचार रोधी फाउंडेशन आस्सेआ दूरदर्शी सोच, नजरियै ते इनें सारे जतनें गी सुचारू ढंगै सिर चलाने लेई यशा मुदगल हुंदे जतनें गी सराहेआ गेआ। इनें सारे जतनें राएं सैलसफा सेक्टर गी खासा बढ़ावा थोआ ऐ।

<><><><><><>

MSME

भलेआ लौहके, लौहके ते दरमेयाने दर्जे दे उद्योगें सरबंधी मंत्रालय दे एमएसएमई डवैलमेंट एंड फ़ैसीलेशन दफ्तर आस्सेआ जम्मू कश्मीर च इस सेक्टर गी बढ़ावा देने लेई केई सारी स्कीमें गी सक्रियता कन्नै चलाया जा'रदा ऐ। एहदे तैहत इक जतन ऐ पी.एम.विश्वकर्मा स्कीम। एहदा मकसद ऐ 18 कारोबारें कन्नै जुड़े दे हुनरमंद कारीगिरें दे जीवन स्तर गी उबड़ा चुक्कना। इस स्कीम तैहत उनेंगी सिखलाई दोहार—कर्ज, उपकरण, ते होर दूई सहायता दिज्जी जंदी ऐ तां जे ओह पैदावार ते म्यार च बाद्धा करी सकन। हाल च गै इस सरबंधे च इक कार्यक्रम बटोत च आयोजित कीता गेआ। एहदा मकसद कारीगिरें गी इनें स्कीमें बारे जागरूक करना हा। इस दरान 15 ज्हार टूलकिट्स बंडे गे।

<><><><><><>

CCTV

ट्रांसपोर्ट आयुक्त विशेष पाल महाजन होरें सारे स्कूलें गी नोटिस जारी करियै हिदायत कीती ऐ जे ओह विद्यार्थिएं दी सुरक्षा गी जकीनी बनाने लेई 31 मार्च 2025 थमां पैहले पैहले सीसीटीवी कैमरे लान। आकाशवाणी जम्मू संवाददाता दी रिपोर्ट मूजब कनून नाफिज करोआने आली अजेंसिएं गी आखेआ गेआ ऐ जे ओह पैहली अप्रैल 2025 थमां खास मुहिम चलान ते इस भेठा जारी हिदायतें गी जकीनी बनान। कुसै बी स्कूल आस्सेआ जेकर इस भेठा कोताही बरती गई तां फही मोटर गडिडएं सरबंधी कनून 1988 तैहत ओहदे पर कारवाई कीती जाग।

<><><><><><>

IMD

अंतर्राष्ट्रीय महिला दिवस दे सरबंधे च आकाशवाणी क्षेत्रीय समाचार एकांश आस्सेआ कल यानि 8 मार्च गी 20 मिंटे दा विशेष कार्यक्रम पेश कीता जाग। एह प्रोग्राम बडलै 7 बज्जियै 10 मिंटे पर प्रसारत कीता जाग। एहदे च बक्ख-बक्ख क्षेत्रें च महिलाएं गी दरपेश चुनौतिएं सरबंध ते उपलब्धिएं बारे गल्ल कीती जाग। इस कार्यक्रम दा मकसद महिला सशक्तिकरण, बरोबरी ते समाज च महिलाएं दी प्रगति बारे गल्ल करना ऐ। इस कार्यक्रम गी साढ़े श्रोता मीडियम वेप 303 मीटर यानि 990 KH3 एफएम 100.3 KH2 पर सुनी सकदे ओ।

<><><><><><>

Annoncement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गोइयां न। इच्छुक आवेदक जेहदी उमर 24 थमां 50 ब'रें दे बश्कार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>